

**KNR-imut illuatungiliussinnaasumik aallakaatitsivimmik pilersitsinissaq.**  
(Inatsisartunut ilaasortaq, Isak Hammond, Inuit Ataqatigiit)

**Akissuteqaat**

(Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoq)

Naalackersuisut oqallisissatut siunnersuummut matumunnga najukkani aallakaatitsiviit kattuffiit STTK-mut, KNR-imut Tele-mullu tusarniaassutigineqartumut qujapput.

Nuna tamakkerlugu radiukkut tv-kkullu kanalimik allamik nunatsinni aallakaatitsivinnit aallakaatitassanik pilersuiffiusumik kissaateqarneq siusinnerusukkut saqqummiunneqarsimavoq assigiinngitsutigullu erseqqissaavimusimalluni.

Soorlu siunnersuuteqartup oqaatigigaa kissaateqarneq nunarujussuatta atassuteqartinneqartariaqarneranik tunngaveqarpoq. Nunatsinni tamani tamaani ulluinnarni inuuneq alapernaallugulu ilisimasaqarfisariaqarparput.

Tamatuma saniatigut najukkani aallakaatitsivinnit aallakaatitaqartalernikkut kalaallisut aallakaatitat amerlanerulissapput minnerunngitsumillu sumiorpaluutit assigiinngitsut atorlugit aallakaatitat amerlanerulissallutik. Oqaatsit nukittorsarniarlugit aamma nunatsinni tamani tamaani oqariaatsit oqaatsillu assigiinngitsut atorveqartut pisuussutigisatta misiginissaannut periarfissaqarnissaq pingaaruteqarpoq.

Tamatumunnga peqatigitillugu inuit allarluinnarmeersut oqallinnerillu allarluinnarmeersut takullugillu tusarnaarsinnaanissaat oqartussaaqataanermut nukittorsaaataassaaq.

Taamatut nuna tamakkerlugu kanaleqalernissamut aporfissat siullermik tassaasimapput teknikimut aningaasaqarnermullu tunngasut:

Ullumikkut teknologiimut digitalinngortitsinerimullu tunngatillugu ineriartortuarnikkut kanalimik allamik pilersitsinissamut periarfissaqarneruleriartortoqarpoq. STTK-p Telellu teknikkut aaqqiissutaasinnaasut assigiinngitsut taakkartorpaat.

Aaqqiissutissap sorliup toqqarneqartussaananerani ilaatigut sumiiffimmi periarfissaasut apeqqutaassapput, qanoq aaqqiissuunneqarnissaa kissaatigineqarnersoq aningaasaqarnikkullu tunngavissat, kiisalu pingaartumik telemut akit tusagassiorfiit suliaqarsinnaanerannut killilersuutaasut STTK-miit KNR-imiillu misigineqarsimasoq.

Naak teknikikkut periarfissagissaartoqarneruleraluartoq aningaasaqarnermut tunngatillugu suli akisunerussaaq, tassami nunatsinni illoqarfinni assigiinngitsuni aallakaatitsivinnit suliaasut kanalimut ataatsimut katersorneqarlutillu aaqqiissuunneqartussaassammata tassangaannillu aallakaatinneqarlutik.

Tamatuma saniatigut kanalimi inissaqarnerulersitsinikkut najukkani aallakaatitassionermut aningaasaliissutit ingerlaannartumik amerlanerulernaviannigillat, najukkani aallakaatitsivinnit naliliisoqarpoq assersuutigalugu pilersaarutinik aallakaatitsisarnikkut kanalimut taama ittumut aningaasartuutit matussuserneqarsinnaanaviannigitsut.

Imarisaanut tunngatillugu ullumikkut najukkani aallakaatitsiviit ataasiakkaaginnaat namminneq tv-  
kkut aallakaatitassiorput. Najukkani tv-  
kkut aallakaatitassiat tamarmiusut atoraluaraanniluunniit  
kanalimi ataatsimi aallakaatitassiat naammatsinneqarsinnaanaviangillat, taamaattumillu  
isumaliutigineqarsinnaavoq najukkani aallakaatitsivinniit aallakaatitassianik aallakaatitsiviusoq  
alla, assersuutigalugu inatsisartut ataatsimiinnginneranni kanalimi maannakkut  
aallakaatinneqartarfianiisinnaannginnersut, imaluunniit allatut periuseqartoqarsinnaanersoq.

Ilaatigulli STTK-mit pingaarutilittut erseqqissaatigineqarpoq taamatut allamik kanaleqalernissaq  
KNR nuna tamakkerlugu tamanut sullissisussaataasoq *pilliutigalugu*  
pilersinneqarsinnaanngimmat. KNR nuna tamakkerlugu tamalaanik aallakaatitsinnaanissamut  
periarfissaqartariaqarpoq, aamma najukkani aallakaatitsiviit, aallakaatitassiorfiit namminersortut  
ilanngutassianik aallakaatitassianilluunniit tunisisinnaallutik.

tassami tv-liorneq akisuvoq – assersuutigalugu maanna KNR-imut aningaasaliissutaasartut atorlugit  
unnummi ataatsimi nammineq aallakaatitassiaannarnik aallakaatitsisoqarsinnaanngilluinnarpoq –  
naak sapinngisaminnik pigaluartut.

Taamaattumilli aamma pingaarneruvoq taamaakkaluartoq nunatsinni tamani tamaani  
aallakaatitassiat amerlanerpaanut apuunnissaat.

Radiumut tunngatillugu sumiikkaluaraanniluunniit aallakaatitassiorneq atuinerlu, kiisalu  
suqaluarnerisunik ataatsikkut ingerlataqarneq akikinnerullunilu pisariinneruvoq. Radio immikkut  
tusarnaartussaqaarfiuvoq. Matumani aamma teknikikkut assigiinngitsunik aaqqiisoqarsinnaavoq,  
taamaattorli aamma tusagassiorfinniit misigineqarsimasoq telemut akit killilersuutaallutik.

Nunatsinni sumiiffinni assigiinngitsuni najukkani radiukku aallakaatitsisoqangaatsiartarpoq,  
ullumikkut nipilersornerunerusumik.

Najukkani aallakaatitsivinnit aamma KNR-ip avataaniillu aallakaatitassiorput  
suleqatigineqarnerulernissaat kissaatigineqarpoq, sulisunik praktikertunillu  
paarlaasseqatigiittarnikkut, ilaatigut suliamik ingerlatsisuusut amerlanerusut nunatsinnut  
pisineqarnissaat siunertaralugu, sineriammit misilittakkanik parlaasseqatigiinnissamut,  
unammilleqatigiinnissamut amerlanerusunillu ilanngutassaqaalernissamut.

Taamaattorli aamma erseqqissaatigineqassaaq matumani NAJUKKANI tusagassiorfiit aamma  
kommunimit angerlarsimaffigisaminnit tapiiffigineqarnissamik atorneqarnissamillu  
pinngitsuuisinnaanngilluinnartut pineqarmata. Kommunerujussuaqalerner  
attaveqatigiinnissamik pisariaqartitsinerusoaqarpoq tamannalu najukkani aallakaatitsivinnik  
atuinerunissamik kinguneqartariaqaraluarpoq, tamannali suli taamaaganngilaq immaqali  
tamatumunnga peqatigitillugu nuna tamakkerlugu aallakaatitsivimmik atuisinnaanikkut tamanna  
aqutissiuunneqarsinnaassaaq.

Taamatut oqaaseqarlutik Naalakkersuisut radiukku tv-  
kkullu kanalimik aallakaatitsivissamik  
allamik pilersitsisinnaaneq pillugu oqallinneq pissarsiaqarfioqqunartoq ammarpaat.